




Kolong ang'orot eboyete ng'itieng daang kaapei. Eboyete kechi a alakara anamoni. Asubete kechi etich emam eng'uring'ur.

Ayei akimuj na etemokino kechi daang. Ayakatar ng'itieng ibore daang ni asakete kechi. Emukit kechi daang amoni. Amam ekerikan epedori anyun ni aya kechi. Alomito a ekisil. Etom apolokinit kech.



Ayei ing'olol lokwas a amoni. Ng'aren keng ayei ekipor.  
Ng'irwa daang elat Etom alotooma amoni. Elat ng'esi  
king'olikinea eger lo iboyoto ng'itieng. Asaki aking'olikin eger  
lo esubeta ng'itieng etich kech. Etesegito kechi amoni.

Ache pak ewokene Etom ng'itieng luche alokaku. Asubanakini  
tani ng'irotin lu itorete ng'itieng anamoni. Arai ng'esi ekapolon  
lo ajokon. Aminasi ng'itieng daang Etom. Erukonomikete ng'esi  
ipurorito.

*Ekapolon kosi lobe Etom, Iyong ipolot noi,*

*Ekapolon kosi lobe Etom, Ijok yong noi!*



Ayei akai na adukitoe losal a amoni. Adukitoe akai ng'ina ejok. Ayakar alaar naajokon. Etakinitae ng'amuja nakaalak namana. Arai akai ng'ina aka Itwan.

Alomito Itwan ka ng'iyenet neni. Arai Itwan ng'esi bon edunyasi ka ng'itieng anamoni. Ayenete ng'esi ng'itieng lukaalak. Akienatar ng'itieng eger lo alosioto ng'itung'a ang'akejen ang'aarei.


Ayeni Itwan dae ng'itieng ng'iche. Anyung'anari esaa lo epudunio anawi keng. Aokene ng'esi ng'akipi anang'olol. Eriamunun tani ka ng'itieng na elosio akiger ng'araito.



Alilim ng'akipi a ing'olol kang'ini. Ayakasi ng'inya lukalibak ekwakaye keng. Alibito ng'inya kaina ng'ikaru daang. Pe aonenete ng'inya ng'ulu. Aminasi ng'itieng aurian kaneni.

Aminasi Etom ka awi keng akilulumare kaneni. Aminasi abolia anakipi ana echoto. Aboliasi kaneni ng'irwa daang, nataparachu todol ebong.


Arai Etom lopaekeng a Itwan kang'ini. Ng'esi achamunea Etom toduk Itwan ng'ini akai lokwaas a amoni. Arai na elosio Etom nawi ng'ina nakinae ng'idison lukabobok.



Apei kolong'it, abu Etom topeyon anawi a Itwan kang'ini.  
Talakar Itwan kipeyou ng'esi. Abu nak ng'esi ng'idison  
lukabobok tanyam. Ani enang'i ebong nakinae Etom ng'idison  
ng'iche inaa ng'itak keng. Abu Etom talakar lokojokon.

Tatalaros ng'itieng na eng'olikineta Etom epuduni anawi a  
Itwan. Nakaneni amam tani ipei kech apedori aking'it etom  
ng'akiro ng'una.


Apotu ng'idison tobobokis ng'itak a Etom noi. King'ita kechi  
apakech ng'idison ng'iche. Nakaneni amam ng'idison edong'ito.  
Pe arupete ng'idison anamoni. Sodi kigoro ng'itak a Etom kiiya  
kiwala. Kichana ng'akiro ng'una Etom ka aberu keng.



Ataparachu nache king'olik Etom Ekadokot elosi. Ng'irwa ng'ulu pe eboyene ekadokot alokidama ekitoe.

“Kape tolimok Itwan kiinak iyong ng'idison yau ainak ng'itak kang.” Kichikak Etom ng'esi. Abu Ekadokok kimook mono ekililing'at. Dio akiyotor diyete Etom.


King'aing'ak ng'esi Etom tama, “Eleteny Itwan noi. Kiinakini iyong ng'idison nakaneni kidemari ng'oni amoni.” Tong'o Etom noi. Torei dio topet Ekadokot a amuro keng. Towatar Ekadokot kimasakin kidiama ekitoe lo ayei diyete nen. Anyoun akwaar ng'ina tarau Ekadokot kidiama ekitoe elomit.



Tanyara Etom nabo Abokok. Arai Abokok ameanara na anupitae. Ng'irwa ng'ulu ayakar Abokok eleu losulut loger a Epir.

“Kape tolimok Itwan kiinak iyong ng’idison yau ainak ng’itak kang.” Sodi Etom kichikak Abokok. Abu Abokok kimook mono ekililing’at. Aemit ng’esi ibore ni esubakinia Etom ng’esi kelimu ateni. Doi akiruorikin eyakar esinyoi.


“Erorokana Itwan lokojokon. Kiinakini ng’idison nakaneni kitodema amoni yok.” Tatachu Abobok. Tong’o Etom lokojokon. Kidichak ng’esi Abokok enyunyura. Todekakin Abokok nikooyan. Ani ejoker togogong’er akaku keng. Pena ng’ikabebekua tani tokona.



Abu nabo Etom tanyarau Eputir. Arai ng'esi etieng'it lokanupan noi. Ng'irwa ng'ulu ayakar Eputir ng'ikitiny lu ajokak, amam ng'ikel apudunito king'a.

“Kape tolimok Itwan kiinak iyong ng'idison yau ainak ng'itak kang.” Kichikak Etom ng'esi. Kimook Eputir mono ekililing’at. Dio alosit nakit a Etom king'aing’ak.

“Egogong akinup Itwan. Ayakar kolong Itwan amana na ekoni amoni nayok naka. Anyaritae amana a Eden. Abu ng'esi tosechakinia ekapolon keng sodi kitwarakinae. Esaki tokona ademar ng'oni amoni yok.” Tatachu Eputir. Todedeng'er Etom. Toremo ekelae keng lowae lo ayei Eputir. Abu ekelae tanang Eputir nabokony. Toriwo ng'ikel a Eputir topudut anakituk tani tokona jik.



Todol tokona ebong. Abu Etom kitam kidiamma ng'akiro nuku akwar kiiya. Nyejotoro ng'esi. Ani nataparachu tanyarua Emun. Ayakar Emun ng'ajul loleu ng'irwa ng'ulu.

“Kape tolimok Itwan kiinak iyong ng'idison yau ainak ng'itak kang.” Sodi Etom kichikak ng'esi. Tobul Emun na eirarea ng'akiro ng'una. Tokoik eleu keng a akituk. Ayeni ng'esi Itwan ng'ini lokojokon. Aremosi ka ng'esi nikooyen.

Dio atachun tama, “Kiboyit kolong ayong ka Itwan ng'ini. Keng'ala ng'esi ayong. Karemit ayong noi. Keriechari ayong akou. Ebuni tani alemar ng'ikel kon. Elemari tani amoni dae.” Kitong'oa ng'akiro ng'una Etom. Kichak akou a Emun a akeju. Kisilek Emun aiun anakitu. Kichak Etom ng'esi todol ni achudarotor ng'ajul aloleu keng. Kidong eleu keng esulut tani tokona.



Apotu ng'itieng daang toyena ng'akiro na asubea Etom Ekadokot. Tolomea Ekadokot kidiama ng'ikito. Apotu tani king'olikis ng'akiro na asubere Abokok. Toyena atamar agogong'er akaku a Abokok.


Eirarito ng'itieng daang ng'akiro na asubere Eputir. Ayenete atamar araut ng'ikel a Eputir epudunito anakituk. Ayenito tani ng'akiro na asubea Etom Emun. Apotu toyena atamar asulutut eleu a Emun. Toyena tani atamar ebutonor eleu a Emun ng'iche-rwa.

Apotu ng'itieng totuko kiriama maketei. Pe asakete ekapolon kech toyen ng'akiro na atukoi. Eng'atuny ng'esi aweikinit ekiriam. Topupokinos atamar ani enyarae Etom etieng'it eche, kirukosi kechi daang neni.



Arekinitae atamar todukae alokwas a amoni king'olikinere ibore ni esubakini Etom. Ayenio atamar enyarauni Etom etieng'it eche. Aemito ng'itieng aapiyar diyete Etom.


Abu Ageya tolimu tama, "Alosi ayong diyete Etom." Kiyatak nabo tama, "Alosi ekwanikin ka ng'akui naalibak." Pe ayeni Etom ng'akiro na arekinitae.



Akolong'it nache tanyara Etom Ekosowan, Arai Ekosowan epe ikeyokok alukanupak. Ng'esi eyokii awi a Etom. Ekote ng'amwar keng na aite. Agogong akitiak ekosowan ka aite.

Arai Ekosowan ekeyokon lokadedeng'an noi. Abu ng'esi torotok alokidor awi a Etom, kikomak ni ayei ekapolon esaki akiirar ng'akiro anyaritere.


Napei adolunio Ekosowan kona, tolim Etom tama, "Kape tolimok Itwan kiinak iyong ng'idison yau ainak ng'itak kang." Kidong Ekosowan ililing wadio.



“Ekapolon kang, eteene ayong Itwan kisemeene ng’oni jiik alokidiamma epem. Esaki akitaraun ng’oni ng’ikedalak keng. King’olik tokona ibore ni esubea ng’esi aite. Esaki abunere alemar ng’amwar a Amosing.” Tatachak ng’esi Ekosowan.


“Elemari ng’esi amoni yok. Etubi ng’ikito todukio ng’akais keng. Etubi ng’ikito kichuny ng’atotol. Etubi ng’ikito kipoo. Itae ng’alup nuku ng’araito nakaalak.” Abu Ekosowan kiatak.

Apotu ng’akiro ng’una kitong’oa Etom. Kidichak ng’esi Ekosowan a ekilae keng. Apotu ng’amwar a Ekosowan tokudokinos. Ering’a ng’amwar a Ekosowan ekudokina tani tokona. Tosiwak Ekosowan torotok anamoni. Tong’er akiyok awi a Etom.



Abu Ageya kiseme ibore daang ni asuba. Adukit ng'esi anakuyen ana ayei kidiama Etom. Tolot tolimok ng'itieng daang ibore ni asuba. Atipei topudut ng'itieng daang lu adukito. Eng'atuny arikit kechi. Kirukokis tamasi:

*Etom! Etom! Etemokin, etemokin!  
Kiira sua ng'akiro na isubea iyong Ekadokot,  
Iboi tokona alokidlama ng'ikito.  
Kiira sua ng'akiro na isubea iyong Abokok,  
Eyakar tokona akaku nakagogong'on.  
Kiira sua ng'akiro na isubea iyong Eputir,  
Eyakar tokona ng'ikel lu epudunito anakituk.  
Kiira sua ng'akiro na isubea iyong Emun,  
Eyakar tokona eleu losulut.  
Nabo tokona Ekosowan! Etemokin, Etemokin!*



Abu Etom tobul lokojokon. Pe atakanete ng'itieng lu erukosi. Kitamu ng'akiro nakolong alimokini Ekadokot ng'esi. Kitamu tani nakolong abalasi Abokok ka Eputir. Kitamu na alimunito Emun ka Ekosowan.

Kitamu tama kori Itwan ebunit alemar ng'ikel keng. Abu toyen atamar aroketa ng'akiro. Dio tanyara ng'ide ka aberu keng. Sodi kechi daang kipung'aros atipei tolomasni namoni toduka.



# GHRRRR!



Apotu ng'itieng talakaros. Abu Ekadokot talakar! Tani Abokok dae. Alakara Eputir! Emun dae talakar. Tojoikis Ekosowan ng'akiro ng'una, talakar. Tong'ero ng'itieng apolou a Etom.

Ekisidi kiwakis ng'itieng ekiriam. Toseut Eng'atuny tarau ekapolon kech. Eng'atuny ng'esi erai ekapolon kech tani tokona.